

ಪೌಲನು ಥೆಸಲೋನಿಕದವರಿಗೆ ಬರೆದ ಎರಡನೆಯ ಪತ್ರಿಕೆ ಪೌಲನೆ ಥೆಸಲೋನಿಕವಾಳಾನ ಲೀಖ್ಯೋತೆ ಬೇನಿ ಚಿಟ್ಟಿ ಮಾಲುಮ್ ಕರಾನು

ಥೆಸಲೋನಿಕವಾಳನ ಪೌಲ ಲೀಖುಕರಸ್ತೆ ಬೇನು ಕಾಗತ್ 1:1. ಥೆಸಲೋನಿಕವಾಳನ ಪಹಿಲು ಚಿಟ್ಟಿ ಲೀಖುಹುಯ್ಯತದೆ, ತುರಂತ್ ಯೋ ಆ ಚಿಟ್ಟಿನ ಲೀಖ್ಯೊ ಯೇಸು ಪೈದಹುಯ್ಯೊತೆ ಇನವಾರ್ ಮ್ಹುಮಾರ್ ಏಕ್‌ಉಪ್ಪರ್ ಐಡೈಖ್ವೊನ ವರಖ್ವೊನ ಪಾರ್ ಆ ಚಿಟ್ಟಿ ಲೀಖಾಯತೆ. ಥೆಸಲೋನಿಕ ಸಬೆನ ಲೀಖಾನಿ ವಖ್ವೊತೆಬಿ ಯೋ ಕೊರಿಂಥಮಾಸ್ ಆ ಸಬೇವ್‌ನ ಇನ ಬೇನು ಶುಭಸಂದೇಶ್‌ನ ಬೋಲಾನಿ ಭಾವಾನಿವಖ್ವೊತೆಮ ಭಾಂದ್ಯೊಅಪೊ 17:1-10. ಥೋಡು ಯೆಹೂದ್ಯ ಅದ್ನಿ ಅಜ್ಜು ಮ್ಹುಮಾರ್ ಗ್ರೀಕ್‌ನು ಅದ್ನಿ ಮಳಿನ್ ಆ ಸಬೆ ಭಂದೈರ್ದು ಕರಿ ಅಪೊಸ್ತಲರ್ದಿ ಪುಸ್ತಕ್‌ಮ ಬೋಲಸ್. ಥೆಸಲೋನಿಕಮಾನು ದೇವ್ನ ಅದೈವ್‌ನ ಖರ್ತಿನ್ ದನ್ನಿ ಬಾರೇಮ ಅಜ್ಜು ಕ್ರಿಸ್ತನು ಬೇನು ಆವಾನಿ ಬಾರೇಮ ಘಣು ಧ್ಯಾನ್ ಲೇವ್ಣು ಶನಕತೊ ಪೌಲನೆ ಇನ ಲೀಖ್ಯೋತೆ ಬೇನಿ ಚಿಟ್ಟೀಮ ಅನಿ ಬಾರೇಮ ಘಣೇಥಿ ಲೀಖಿರಾಖ್ಯೊಸ್. ಆ ಬೇನು ಥೆಸಲೋನಿಕನು ಚಿಟ್ಟೀಮ ಮ್ಹುಮಾರ್ ಆಧುಭಾಗ್ ಖ್ವತಮ್ ಹುವಾನ ವೇಳ್ತಲೀಖಾಯು. ಪೌಲನೆ ಮೂರತ್‌ನಿ ಪೂಜಾನಿ ಬಾರೇಮಾಬಿ ರ್ಪೀತಾವಸ್. ಹರೇಕ್‌ಫಣು ಇನ ಖಾಣನಖ್ವಾಜೆ ಕಾಮ್‌ಕರ್ದುಕರಿ ಬೋಲಸ್. 3:6-10

ಕಾಡಿದೇಖೊ

1. ಪೌಲನೆ ಚಿಟ್ಟೀಮ ಇನು ಅಜ್ಜು ಇನ ಜೋಡೆ ರ್ವಾಳಾನ ವತಾಳ್ತೊ ಹುಯಿನ್ ಶುರುಕರಸ್. 1:1-2
2. ಇನಕೇಡೆಥು ಯೊ ಥೆಸಲೋನಿಕನು ದೇವ್ನ ಅದ್ನಿವೋನ

ಝೂಂಡ್‌ನಖ್ವಾಜಿ ದೇವ್ ಧನ್ಯವಾದ್ ಕರಸ್. ಅಜ್ಜು ಪ್ರಾರ್ಥನೆ ಕರಸ್. 1:3-12

3. ಪೌಲನೆ ಖರ್ತಿನ್ ದನ್ನ ವಖ್ವತ್‌ನಿ ಬಾರೇಮ ವಾತೆ ಬೋಲಸ್. 2:1-17

4. ಇನಕೇಡೆಥು ಯೋ ವಳ್‌ಶಿನಿ ಬಾರೇಮ ವಾತೆ ಬೋಲಸ್. ಅಜ್ಜು ಕಾಮ್ ಕರ್ನುಸ್ ಕರ್ನ್ ಕರಿ ಬಾರೇಮ ವಾತೆ ಬೋಲಸ್. 3:1-15

5. ಪೌಲನೆ ಬಿಜೇಕ್ ಹಲ್ಲ ದೇವ್ ಅದ್ವಿವ್‌ನ ಟೋಳ್ಳ ಖ್ವಲಾಮ್ ಕರ್ತೊಹುಯಿನ್ ಚಿಟ್ಟಿನ ಖ್ವತಮ್ ಕರಸ್. 3:16-18

¹ ಅಪೊ ಬಾ ಹುಯಿರ್ದೋತೆ ದೇವ್‌ಮ ಅಜ್ಜು ಪ್ರಭು ಹುಯಿರ್ದೋತೆ ಯೇಸು ಕ್ರಿಸ್ತಮ ಛಾತೆ ಥೆಸಲೋನಿಕ ಸಬೆನ, ಪೌಲ, ಸಿಲ್ವಾನ ಅಜ್ಜು ತಿಮೊಥೆ ಕರಿ ಹಮೆ ಲೀಖುಕರೇಸ್ತೆ ಶಾತ್‌ಕತೊ,

² ಅಪೊ ಬಾ ದೇವ್‌ಥಿಬಿ ಅಜ್ಜು ಪ್ರಭು ಯೇಸು ಕ್ರಿಸ್ತಧಿ ತುಮೂನ ವಾರ್‌ಖೊ ಅಜ್ಜು ಶಾಂತಿ ಮಳಾದೆ.

ಕ್ರಿಸ್ತ ಆವಾನಿವಖ್ತೆ ತೀರ್ಪ್

³ ಹಮಾರ ಬೈಯೆ ಭೇನೊ, ತುಮಾರಿ ಬಾರೇಮ ಹಮೆ ಹಮೇಶ ದೇವ್‌ಧನ್ಯವಾದ್ ಕರಿಯೇಸ್. ಅಮ್ ಕರಾನು ಹಮೂನ ಬರೊಬರಸ್ ದೆಖಾಯು, ಶನಕತೊ ತುಮಾರಿ ವಿಶ್ವಾಸ್ ಘಣು ಭಡುಕರಾಸ್ ಅಜ್ಜು ಏಕ್‌ಥಿಏಕ್ ತುಮಾರಿ ಪ್ಯಾರ್ ದನ್‌ಪರ್-ದನ್ ಭಡ್ತು ಜಾವಾದೆ.

⁴ ಶನಕತೊ ತುಮೆ ಖ್ವಮಾಳಮಾಬಿ ಖ್ವತಾಪ್ಪಿಮಾಬಿ ತುಮಾರಮ ದೆಖಾಯುತೆ ವಿಶ್ವಾಸ್‌ಖ್ವಾಜಿಧಿ ದೇವ್ನಿ ಅದ್ವಿನಿ ಸಬೇಮ ಕಮ್‌ರೋಕಿ ವಾತೆ ಬೋಲಿಯೇಸ್.

⁵ ದೇವ್ನಿ ನೀತಿನಿ ತೀರ್ಪ್‌ನ ಖ್ವಾಚು ಖಿವುಕತೊ, ತುಮೆ ಲತಾಡಪಡುಕರಾತೆ ದೇವ್ನಿ ರಾಜ್ಯನ ತುಮೆ ಲ್ಹಾಯಕ್ ಹುಯಿರ್ದವಾನು.

⁶ ನ್ಯಾವ್ನು ಕೋಣ್ ಕರಸ್ಕಿ ಇವ್ವುನ್ ದೇವ್ ಅಲ್ಫ್ಫುಸ್ ಕರಸ್. ತುಮೂನ ಕೋಣ್ ಖ್ವತಾವಸ್ಕಿ ಇವ್ವುನ್ ದೇವ್ ಖ್ವತಾವಸ್,

7 ಅಜ್ಜು ವಾಖ್ಯೊ ಛಾತೆ ತುಮುನಾಬಿ ಹಮೂನ ಪರಿಹಾರ್ ಕರ್ತೆ. ಪ್ರಭು ಹುಯಿರ್ದೊತೆ ಯೇಸು ಮಹಾ ಶಕತ್‌ವಾಳೊ ದೇವ್‌ದೂತರ್‌ನ ಜೋಡೆ ಸೊರ್ಗ್‌ಧೊ ದೆಖಾವಾನಿ ವಖ್ತಾಮ, ಇನ ಸಮಾಧಾನ್ ದಿಶೆ.

8 ಯೊ ಆಗ್‌ನಿ ಝಲ್‌ಪಟ್ ಜೋಡ್ ಕೋಣ್ ದೇವ್ ರೊಕ್ತಾವಸ್ತಿ ಅಜ್ಜು ಯೇಸು ಪ್ರಭುನಿ ಬಾರೇನಿ ಸುವಾರ್ತೆನ ಮಾನ್ಯಕೊಯ್ತಿಕಿ ಇವ್ಣುನ ನಿಶತ್ ದೈವಾನ ಆವ್‌ಶೆ.

9 ಪ್ರಭು ಇವ್ಣುನ ಇನಿ ಮಹಿಮೆನಿ ಶಕತ್‌ಖ್ವಾಂವ್ಣೆಧು ಹಟ್ಟೆನಾಖಿದಿನ್ ಇವ್ಣುನ ಹರ್‌ಹಮೇಶಾನು ನಿಶತ್ ದಿಶೆ.

10 ಇನೆ ಯೋ ದನ್ತ ಇನ ಪರಿಶುದ್ ಅದ್ಮಿವ್‌ಧಿ ಮಹಿಮೆಬಿ ಅಜ್ಜು ವಿಶ್ವಾಸ್‌ಮ ರ್‌ದ್ಲೆಯ್ತೆ ಇವ್ಣೆಧಿ ಮರ್ತ್ಯಾದಿಲೀನ್ ಆವಾಸ್ತಿ ಯೊ ಅದ್ಮಿನಿ ಬೀಚ್ಚತುಮೇಬಿ ರ್‌ದ್ಲೆಶು. ಶನಕತೊ ಹಮೆ ತುಮುನ ಬೋಲ್ಯಾತೆ ಸಾಕ್ಷಿನ ತುಮೆ ನಂಬಿರಾಖ್ವಾಸ್.

11 ಅನಖ್ವಾಜೆಸ್ ಹಮೆ ಕದೇಬಿ ತುಮಾರಖ್ವಾಜೆ ಪ್ರಾರ್ಥನ್ ಕರಿಯೇಸ್. ಅಪ್ಣೊ ದೇವ್ ತುಮೂನ ಬುಲಾಯೋತೆ ಇನಖ್ವಾಜೆ ಯೋಸ್ ತುಮುನ ಲ್ಹಾಯೇಕ್‌ನಿ ಗಣ್ತಿ ಕರಿರಾಖ್ಯೊಸ್. ತುಮಾರಿ ಶಕತ್ ವಿಶ್ವಾಸ್‌ಧೀಬಿ ತುಮಾರಿ ಆಖ್‌ನ್ ಅಜ್ಜು ಅಲ್ಲಾನ್ ಪೂರ ಕರಾದೆಕರಿ ಬಿಂತಿ ಕರ್ಯೆಸ್.

12 ಅಮ್ಕಸ್ ಅಪ್ಣೊ ಪ್ರಭು ಹುಯಿರ್ದೊತೆ ಯೇಸು ಕ್ರಿಸ್ತನು ನಾಮ್ ತುಮಾರೇಧಿ ಮಹಿಮೆ ಉಶೆ, ಅಜ್ಜು ಇಮ್ಕಸ್ ತುಮೇಬಿ ಇನಾಮ ಮಹಿಮೆ ಲಿಶು. ಯೋ ಮಹಿಮೆ ಅಪ್ಣೊ ದೇವ್ ಅಜ್ಜು ಪ್ರಭು ಹುಯಿರ್ದ್ವಾಳ ಯೇಸು ಕ್ರಿಸ್ತನಿ ವಾರ್‌ಖ್ವೆಧಿ ಚಾಲಾದೆ.

2

ಝೂಟೊ ಅದ್ಮಿನಿ ಬಾರೇಮ

1 ಬೈಯೆ ಭೇನೊ, ಅಪ್ಣೊ ಪ್ರಭು ಹುಯಿರ್ದೊತೆ ಯೇಸು ಕ್ರಿಸ್ತ ಆವಾನಿ ಬಾರೇಮ ಅಜ್ಜು ಅಪ್ಣೆ ಖ್ವಾರು ಎಕ್ಚು ಹುಯಿನ್ ಇನ ಮಳಾನಿ ಬಾರೇಮ ತುಮೂನ ಬೋಲಿಲಿಯೇಸ್.

2 ಪ್ರಭುನೊ ದನ್ ಐರೋಸ್ ಕರಿ ತುಮೆ ಆತ್ಮಧಿರೈಲೇವೊ ವಾತೆಮರೈಲೇವೊ ಹಮಾರಿ ಚಿಟ್ಟಿರೈಲೇವೊ ತುಮೆ ವಗ್ಗಿಸ್‌ಮ ಕಲಾವ್ವಿನಕೊಹುವೊ.

3 ಕೋಣ್‌ಬಿ ಕೆವ್ವಿತರಿಖಾಮಾಬಿ ರಗಾವ್ವುನಾತೆ ಇಮ್ ದೇಖಲೇವೊ. ಶನಕತೊ ಪಹಿಲೆ ವಿಶ್ವಾಸ್‌ನ ಕಾಡಿನಾಖಿನ್ ನಾಶಕರವಾಳೊ, ವಿರೋದಿ ಭಡ್ಕಲಗುಬಿ ಯೊ ದನ್ ಆವ್‌ಶೆ ಕೊಯ್ತಿ.

4 ಖಿವು ದೇವ್‌ನು ಹುಯಿರೈಸ್ ನತರ್ ಆರಾದನೆನ ಯೋಗ್ಯಹುಯಿರೈವನು ಹುಯಿರೈಸ್, ಯೋ ಖ್ವಾರಾನ ನಾಶ್ ಕರ್ಪೆ. ಇನು ಯೋಸ್ ಖ್ವಾರೇಡಿಬಿ ಭಡೈಲೇನ್, ದೇವ್ನಿ ಮಂದಿರಮ ಬೇಶಿನ್ ಯೋಸ್ ದೇವ್‌ಕರಿ ಬೋಲಿಲಿಶೆ.

5 ಮೇ ತುಮಾರಿ ಜೋಡ್ಕ ಧೋತೆ ತದೆ, ಆ ಖ್ವಾರಿ ಬಾರೇಮ ಬೋಲೈತೆ ತುಮೂನ ಯಾದ್ ಕೊಯ್ತಿಕಿ ಶು?

6 ಯೋ ಬರೋಬರನಿ ವಖ್ತಮ ದೆಖಾವ್ವುನಾತೆ ಇಮ್ ಅನಿ ಬಾರೇಮ ಶಾತ್ ಅಡ್ಡಿ ಹುಯಿರೈಸ್‌ಕರಿ ತುಮೂನ ಮಾಲುಮ್ ಛಾ.

7 ರಗಾವ್ವು ಅಜ್ಜುಬಿ ಗಪ್ಪಡಿ ಕಾಮ್ ಕರುಕರಸ್. ಕತೋಬಿ ಅನ ಲೇರೈರಾಖವಾಳೊ ವಾಟ್ ಮ್ವೆಲಾಲಗುಬಿ ಯೋ ಗಪ್ಪಡೀಸ್ ರೈಶೆ.

8 ಯೋ ಅಧರ್ಮಿ* ದೆಖಾವ್‌ಶೆ. ಪ್ರಭು ಯೇಸು ಇನ ಮ್ವೊಡಾನು ದಮ್‌ಥೀಸ್ ಇನ ಮಾರಿನಾಕ್‌ಶೆ. ಅಜ್ಜು ಯೋ ಹಿಜ್ಜಾ ರೈಶೇತೆ ಇನಖ್ವಾಜೀಸ್ ಇನ ನಾಶ್ ಕರಿನಾಕ್‌ಶೆ.

9 ಯೋ ಅಧರ್ಮಿ ಶೈತಾನ್ನಿ ಶಕಧ್ಲಿ ಭರೈನ್ ಆವ್‌ಶೆ ಅಜ್ಜು ಕೈಯಿಕ್ಕಿಥರಾನು ರಗಾವನು ಮೋಟುಕಾಮ್, ಅದ್ಭುತ್‌ಕಾಮ್, ಚಮತ್ಕಾರ್‌ನ ಕರ್ಪೆ.

10 ಇವ್ವೆ ಖ್ವಾಚಿನ ಪ್ಯಾರ್ ನಾಕರೀನ್, ರಕ್ಷಣೆ ಕೋಲೆಯಿಂತೆ ಝಿಟ್ಕಾರಿನ್ ನಾಶನ್ನ ಮಾರಗ್‌ಮ ರೈವಾಳನ ಅಖ್ವೀಸ್ ಥರಾನಿ ಖರಾಬ್ ದಿಮಾಕ್‌ಥಿ ಯೋ ರಗಾವ್‌ಶೆ.

11 ಇನಖ್ವಾಜೀಸ್ ದೇವ್ ಇವ್ವುನ ಘಣಿ ಮೈಕಮ್ಮ ನಾಖಿನ್ ಇವ್ವೆ

* 2:8 2:8 ಅಜ್ಜಾನ ವಿರೋದ್ ಕರಾವಳೊ

ಯೋ ಝುಟಿನ ನಂಬಾನಿಫೋಣಿ ಕರ್ಷೆ .

12 ಅನೇಥಿ ಖ್ವಾಚಿನ ವಿಶ್ವಾಸ್‌ಕರೈಕೊಂತೆ, ಪಾಪ್ಪು ಕಾಮ್ ಮುಶಿಕರಾವಾಳ ಹರೇಕ್ಷ ತೀರ್ಪ್ ಉಶೆ.

ತುಮೆ ರಕ್ಷಣೆನ ಚುಣಿಲಿದ

13 ಪ್ರಭು ಪ್ಯಾರ್ ಕರಾಸ್ತೆ ಬೈಯೆ ಭೇನೆವೊ, ಹಮೆ ತುಮಾರಿ ಬಾರೇಮ ಹಮೇಶ ದೇವ್ ಧನ್ಯವಾದ್ ಕರಾವಳ ಹುಯಿರ್ದಾಸ್. ಶನಕತೊ ತುಮೆ ಪವಿತ್ರಾತ್ಮಾಧಿ ಪಾಕ್ ಹುಯಿನ್, ಖ್ವಾಚಿಪರ್ ವಿಶ್ವಾಸ್‌ರಾಖಿನ್ ರಕ್ಷಣೆನ ಲೀಲ್ಯಾವದೆಕರಿ ದೇವ್ ತುಮೂನ ಶುರುವಾತ್‌ಮಾಸ್ ಚೂಣಿರಾಖೊಸ್.

14 ತುಮೆ ಅಮ್ ರಕ್ಷಣೆಮ ಐನ್, ಅಪ್ಲೊ ಪ್ರಭು ಯೇಸು ಕ್ರಿಸ್ತನಿ ಮಹಿಮೆಮ ಪೇಖ್ಣಾಣುಕರಿ, ಹಮೆ ಬೋಲ್ಯಾತೆ ಸುವಾರ್ತೆಧಿ ದೇವ್ ತುಮೂನ ಬುಲಾಯೊ.

15 ಇನ್‌ಖ್ವಾಜೀಸ್ ಹಮಾರ ಬೈಯೆ-ಭೇನೆವೊ, ಘಟ್ ಭೀರೈವೊ, ಹಮೆ ವಾತೇಧಿರ್ದವೊ ಅಜು ಹಮೆ ಲೀಖ್ಯಾತೆ ಕಾಗತ್‌ಧಿರ್ದವೊ ತುಮೂನ ಮಾಲುಮ್ ಕರಾಯಾತೆ ಪದತ್ತಿನ ತುಮೆ ಘಟ್ ಧರಿಲೆವೊ.

16 ಅಪ್ಪುನ ಪ್ಯಾರ್ ಕರೀನ್, ಕೆದೇಬಿ ರ್ದವಾನು ಹುಮ್ಮಖ್ವಾನಬಿ, ಅಲ್ಫು ಭರೋಖ್ವಾನಬಿ ಇನಿ ವಾರ್‌ಖ್ವೇಧಿ ದಿದೋತೆ ಅಪ್ಲೊ ಬಾ ಹುಯಿರ್ದೋತೆ ದೇವ್‌ಬಿ ಅಪ್ಲೊ ಪ್ರಭು ಯೇಸು ಕ್ರಿಸ್ತ ಯೋಸ್ ತುಮಾರ ದಿಲ್‌ಮನ್ನ ಧಿಲ್‌ಪತ್ ದೈವಾದೆ.

17 ಖ್ವಾರಿಸ್ ತರ್ದಾನು ಅಲ್ಫುಕಾಮ್‌ಬಿ ಅಲ್ಫು ವಚನ್‌ಮಾಬಿ ತುಮುನ ಭಾಲಿದೈವಾದೆ.

3

ಹಮಾರಖ್ವಾಜೆ ಪ್ರಾರ್ಥನೆ ಕರೊ

1 ಹಮಾರ ಬೈಯೆ ಭೇನೆವೊ, ಹಮಾರಖ್ವಾಜೆ ಪ್ರಾರ್ಥನೆ ಕರೊ, ಪ್ರಭುನಿ ವಚನ್ ತುಮಾರಾಮ ಪೈಲೀತೆ ಇಮ್ಮಸ್, ಬಿಜಿಖ್ವಾರಿ ಬಾಜುಮಾಬಿ ವಗ್ಗಿಸ್ ಪೈಲೆನ್ ಮಹಿಮೆ ಹುವಾದೆ.

2 ಅಜ್ಜು ದೇವ್ ಹಮೂನ ಮೂರ್ಖ್ ಹುಯಿರ್ದೊತ್ತೆ ಖರಾಬ್ ಅದ್ವಿನ ಹಾತೇಥಿ ಬಚಾಡನಿ ಘೋಣಿಬಿ ಪ್ರಾರ್ಥನೆ ಕರೋಕಿ, ಕ್ರಿಸ್ತನು ವಿಶ್ವಾಸ್ ಅಖ್ವಾಸ್‌ಮ ರಡ್ಡಿಯಿಕೊಯ್ನಿನಿ.

3 ಕತೋಬಿ ಪ್ರಭು ವಿಶ್ವಾಸ್‌ವಾಳೊ, ಯೋ ತುಮೂನ ಶಕತ್ ದೀನ್, ಖರಾಬ್‌ನ ಹಾತ್‌ಮ ಖ್ವಪಡ್ತುನಾತೆ ಇಮ್ ಬಚಾಡ್‌ಶೆ.

4 ಹಮೆ ಬೋಲ್ಯಾತೆ ಇಮ್ ತುಮೆ ಕರುಕರಸ್ ಅಜ್ಜು ಖ್ವಾಮ್ಣೇಬಿ ತುಮೆ ಕರ್ಪುಕರಿಬಿ ಪ್ರಭುನೆ ಹಮೂನ ಭರೋಖ್ವೊದೀರಾಖ್ವೊಸ್.

5 ತುಮೆ ದೇವ್ನಿ ಲಾಡ್‌ಮಾಬಿ ಕ್ರಿಸ್ತನು ಖ್ವಮಾಳಿಲ್ಯಾವಾಮಾಬಿ ಮಳಾನಿಘೋಣಿ ಪ್ರಭುಸ್ ತುಮೂನ ಚಲಾವದೆ.

ಕಾಮ್ನು ಜಿಮ್ಮೆದಾರಿ

6 ಹಮಾರ ಭೈಯೆ ಭೇನೆವೊ, ಕಾಮ್ ಕರಾಕೊಂತೆ ಅಜ್ಜು ಹಮೆ ಬೋಲ್ಯಾತೆ ಪದತ್ತಿನ ಪಾಡನ್ ಚಾಲಕೊಂತೆ ವಿಶ್ವಾಸಿ ಖ್ವಾರೇಥಿ ತುಮೆ ದೂರ್ ರಡ್ಡೀಣು. ಪ್ರಭು ಹುಯಿರ್ದೊತ್ತೆ ಯೇಸು ಕ್ರಿಸ್ತನ ನಾಮ್‌ಪರ್ ತುಮೂನ ಹುಕುಮ್ ದಿಯೇಸ್.

7 ಹಮೆ ಜಿವ್ಯಾತೆ ಇಮ್ತುಸ್ ತುಮೇಬಿ ಜಿವ್ವುಕರಿ ತುಮೂನ ಅಲ್ಪಿನಿತರ ಮಾಲುಮ್ ಛಾ. ಹಮೆ ತುಮಾರಕನ ಧಾತೆ ತದೆ ಶೋಂಬೇರಿ ಕೋಥಾನಿ.

8 ಫುಗಟ್‌ಥಿ ಹಮೆ ಕಿನಕನಾಬಿ ಖಾಣು ಖಾದಕೊಯ್ನಿ. ತುಮಾರಮ ಕಿನಾಪರ್‌ಬಿ ಹಮೆ ಭಾರೊ ನಾ ನಾಕ್ವುಕರಿ ಹಮೆ ರಾತ್-ದನ್ ಕಾಮ್ ಅಜ್ಜು ಮ್ಹಿನತ್ ಕರೀನ್ ಜಿವ್ವುಚ್ಚಲಾಯೆ.

9 ತುಮಾರೇಥಿ ದೇಕ್‌ಬಾಲ್ ಕರೈಲ್ಯವಾನ ಹಮೂನ ಹಕ್‌ಕೊಯ್ನಿಕರಿ ಕಾಹೆ, ತುಮೆ ಹಮಾರಿನಿತರ ಚಾಲಾದೆಕರಿಸ್ ತುಮೂನ ಇಮ್ ದೆಖ್ವೆಲಿದಾತೆ.

10 ಇನಖ್ವಾಜೇಸ್ ಹಮೆ ತುಮಾರ ಜೋಡೆ ಧಾತೆ ತದೆ, “ಕಾಮ್ ಕರಾಕೊಂತೆ ಯೊ ಖಾಣು ನಾಖಾವ್ಣು” ಕರಿ ಹುಕುಮ್ ದಿದಾಥಾತೆ.

11 ಕತೋಬಿ ತುಮಾರಾಮ ಥೋಡುಭಣು ಖೆವು ಕಾಮ್‌ಬಿ ಕರುಕರಾಕೊಂತೆ, ಬಿಭಾನ ಕಾಮ್ನು ಗೋಡೊ ಘಾಲ್ತುಹುಯಿನ್, ವಳಾಶಿನು ಜಿವ್ವು ಜಿವ್‌ಕರಾಸ್ ಕರಿ ಹಮೂನ ಖಬರ್‌ಪಡ್ತು.

12 ಅಥ್ರಾನ ಅದ್ಮಿವ್‌ನ ಹಮೆ ಇವ್ವು ಕಾಮ್ ಇವ್ವೇಸ್ ಕರ್ತುಹುಯಿನ್, ಇವ್ವ ಖಾಣಾನಖ್ವಾಜೆ ಇವ್ವೇಸ್ ಕಮಾವ್ವುಕರಿ, ಹಮೆ ಪ್ರಭು ಯೇಸು ಕ್ರಿಸ್ತನ ನಾಮ್‌ಹುಕುಮ್ ದೀನ್ ಅಙ್ಲು ಬೋಲಿಲಿಯೆಸ್.

13 ಕತೋಬಿ ಹಮಾರ ಭೈಯೆ-ಭೇನೆವೊ, ತುಮೇತೊ, ಅಱ್ಱು ಕರಾಮ ಕದೇಬಿ ಬೇಜಾರ್ ಕರ್ತು ನಕೊ.

14 ಆ ಚಿಟ್ಟೇಮ ಹಮೆ ತುಮೂನ ಬೋಲುಕರೇತೆ ಕೋಣ್ ಇನ ಮಾನಕೊಯ್ತಿಕೆ, ಇಮ್‌ನಾನಿ ಖ್ವಣೇದ್ ಕರೀನ್, ಇನ ಖ್ವರಮ್ ಲಾಗಾನಿಘೋಣಿ ಕೋಣ್‌ಬಿ ಇನಿ ಖ್ವಂಗ್ ನಕೊ ಕರೊ.

15 ಕತೋಬಿ ಇನ ದುಶ್‌ಮನ್ನಿಘೋಣಿ ನಕೊ ಸೋಚೊತೆ ಅನಬದಲ್ ಇನ ವಿಶ್ವಾಸಿ ಭೈಕರಿ ಸೋಚಿನ್ ಅಕ್ಕಲ್ ಬೋಲ್.

ಖ್ವರ್ತಿನಿ ವಾತೆ

16 ಶಾಂತಿವಾಳೊ ಪ್ರಭು ಖ್ವದ್ ತುಮೂನ ಖ್ವಾರಿಸ್ ವಖ್ವತ್‌ಮ ಅಙ್ಲು ಖ್ವಾರಿಸ್ ತರ್ತ್ವಾಮ ಶಾಂತಿ ದೈವಾದೆ. ಪ್ರಭು ತುಮಾರ ಖ್ವಾರಸ್ಸ ಜೋಡೆ ರ್ತ್ವಾದೆ.

17 ಪೌಲಕರಿ ಮೇ ಮಾರ ಹಾತೇಥಿಸ್ ತುಮೂನ ಖ್ವಲಾಮ್ ಲೀಖುಕರುಸ್. ಮೇ ಆಸ್ ಪರಕ್ ಚಿಟ್ಟೇಮ ಅಮ್ಮಸ್ ರುಜು ಕರುಸ್. ಮೇ ಲೀಖಾನು ತರೀಕ ಆಸ್‌ಹುಯಿರ್ದಸ್.

18 ಅಪ್ಪೊ ಪ್ರಭು ಯೇಸು ಕ್ರಿಸ್ತನಿ ವಾರ್‌ಖ್ವೊ ತುಮಾರ ಅಖ್ವಾಸ್ಸಿ ಜೋಡ್ ರ್ತ್ವಾದೆ.

ದೇವಿ ಖಾಚಿ ವಚನ್

The New Testament in the Vaagri Booli language of India: ದೇವಿ ಖಾಚಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವಿ ಖಾಚಿ ವಚನ್ ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06